



KEMARAU BELUM REDA

Nelayan mula resah

BETING pasir terbentuk di Sungai Segamat kesan kemarau menyukarkan nelayan air tawar mengemudi bot sangkut bagi mendapatkan hasil tangkapan. - Gambar NSTP/AHMAD ISMAIL

Oleh Ahmad Ismail
am@hmetro.com.my

HM 15/01/24 pg 21
Segamat

Lebih 60 nelayan di Sungai Segamat dan Sungai Chodan di sini, resah apabila hasil tangkapan ikan semakin berkurangan akibat musim kemarau sejak Jun lalu.

Tinjauan di Sungai Segamat semalam mendapati kebanyakan jaring dan pukuk tidak memberi hasil menggalakkan dan hanya beberapa ikan sahaja ter-

sangkut selepas dipasang lebih sembilan jam.

Keadaan itu memaksa nelayan meneroka beberapa kawasan di hilir sungai walaupun perlu menanggung risiko bot dan jaring rosak akibat tersangkut pada tunggul kayu dan beting pasir.

Nelayan, Mohamad Yahya, 50, berkata pendapatannya merosot sejak kebela-kangan ini ditambah pula dengan keadaan beting pasir yang semakin banyak kelihatan akibat paras air sungai semakin susut.

Menurutnya, dia hanya mampu mendaratkan kira-kira empat kilogram (kg) ikan berbanding sebelum ini lebih 20 kg setiap kali keluar menangkap sekitar Sungai Segamat dan Sungai Chodan.

“Dengan usia semakin lanjut, saya tak mampu hendak pergi ke kawasan lebih jauh dan dalam, pukuk mudah tersangkut serta rosak.

“Saya menjadi nelayan sejak 1980-an, kami memang tiada sumber pendapatan lain, jadi terpaksa

ambil upah memperbaiki jaring dan lukah buat sementara ini,” katanya.

Pengerusi Persatuan Nelayan Darat Segamat, Mansor Ibrahim, 72, berkata beting pasir semakin banyak kelihatan menyebabkan ramai nelayan terpaksa mengubah haluan bot ke lubuk lain yang lebih jauh.

“Ini berikutan jumlah pendaratan ikan di kawasan berkenaan semakin berkurangan sejak beberapa bulan lalu dan menurun apabila musim kemarau berpanjangan,” katanya.